



ANG

Paghimakas

Pabayagan sang Partido Komunista sang Pilipinas ★ Isla sang Negros

Ginaubayan sang Marxismo-Leninismo-Maoismo HULYO 2023

Taas kamao para kay Ka Rogelio Posadas!

Subli-on ang iya rebolusyonaryo nga optimismo sa pag-agaw sa inisyatiba agud mapat-od ang kadalag-an sang inaway banwa sa isla sang Negros!

*Komiteng Rehiyunal sang Partido sa Isla sa Negros
Hulyo 20, 2023*

"Taas kamao..." sundan sa pahina 2

AP *Kaundan*

-
- Taas Kamao kay Ka Rogelio Posadas!, p1
- Ang kamatayon sang kaupod, p4
- Buhi si Ka Rogelio "Ka Cocoy" Posadas, Dunganon ang Iya Kabuhi!, p5
- Pula nga Pagsaludo sa imo, Ka Rogelio Posadas!, p8
- Rogelio 'Ka Cocoy' Posadas, mapag-on nga kadre sang Partido, p10
- Ka Cocoy (Rogelio Posadas) bilang isa ka Kaupod, p11
- Rebong Diwa nga Iwag, p12

"Taas kamao..." halin sa pahina 1

"Ang kasaysayan sang panghimulos nagahambal nga indi ini magbiya sa entablado sang kasaysayan sang iya nga kagustohan. Kinahanglan ini wasakon paagi sa demokratiko-rebolusyonaryong kahublagan sang pumuluyo." - Ka Rogelio Posadas

ANG KOMITENG REHIYUNAL SANG PARTIDO sa Isla sang Negros (KRPIN) upod ang bug-os nga katapuan sang Partido, ang mga Pulang kumander kag hangaway sang New People's Army (NPA) kag mga rebolusyonaryong pwersa sa isla sang Negros ang mataas nga nagaalsa sang kamao sa pagsaludo kay Rogelio "Ka Cocoy" Posadas, 62, nga nagtigana sang dako nga bahin sang iya kabuhi bilang matuod nga alagad sang masang ginahimuslan, ilabi na sa isla sang Negros, kutob sa iya kamatayon sa kamot sang berdugo nga Armed Forces of the Philippines (AFP) sadtong nagligad nga Abril 20.

Gin-abdak si Ka Cocoy upod kay Lyngrace Marturillas kag mga drayber sang habal-habal nga sila ni Renel delos Santos kag Denald Mialen sang mga elemento sang 303rd Brigade-Philippine Army samtang nagabyahe sa dalan sang Isabel-a-Hinigaran sadtong Abril 19, mga alas 6:00 sang gab-i. Pagkatapos sang pila ka oras nga pisikal kag mental nga tortyur, ginbalhin ang iya lawas paagi sa helikopter sa indi matalupangdan nga oras sang masunod nga adlaw didto sa Sityo Cabite, Brgy. Santol, Binalbagan, Negros Occidental kon sa diin naggasto ang AFP sang minilyon agud mapatihan nga si Ka Cocoy ang napatay sa 10 ka minuto nga inaway batuk sa 62nd Infantry Battalion (62nd IB) kag 94th IB. Tubtob subong, ang berdugo nga 303rd Brigade ang nagpakalinong bahin sa pwersahan nga pagkadula sang iya mga kaupdanan.

Ang hinali nga pagpamatay sa mga rebolusyonaryo ang polisiya sang mahuyang sa pulitika nga rehimen pareho sa ila ni Duterte kag Marcos Jr. Ang isla sang Negros may malaba nga listahan sang maayo gid nga mga rebolusyonaryo kaangay ni Ka Cocoy nga ginsalbeyds sang reaksyunaryo

nga estado kasubong sang iya kaupod nga Konsultant sang National Democratic Front of the Philippines (NDFP) nga si Ericson Acosta, Tigpamaba sang NPA Negros nga si Juanito Magbanua (Romeo Nanta), kag mga kadre pangrehiyon nga sanday Kerima Tariman (Ka Ella), Marilyn Badayos (Ka Monet) kag Florida Ceballos (Ka Kelly). Sila ang gindakop nga wala sang ikabato antes ginpatay nga wala sang kaluoy pareho sa pagpatay kay Benito Tiamzon (Ka Laan) kag Wilma Austria (Ka Bagong-tao) kag walo ka mga kaupod, Jorge Madlos (Ka Oris), Menandro Villanueva (Ka Bok), kag madamo pa nga iban.

Ginbun-ag si Ka Cocoy sa isa ka pamilya sang manggaranon nga mangunguma halin sa Davao City. Ginpadala siya sa San Carlos Seminary sa Cebu agud magsulod sa pagkapari samtang nagauswag ang *First Quarter Storm* sadtong tinuig sang 1970. Na-impluwesyahan siya sang nagaibwal nga pungsodnon nga kahublagan sang mga estudyante kag kontra-pasista nga sentimento sa panahon sang Laye Militar. Nakigbahin siya sa pagpangabuhi upod sa sandigan nga mga masa sa imol nga taga-syudad kag sa komunidad sang mga mangunguma nga nagpakita sa iya sang kamatuoran sa kahimtangan pangkatilingban.

Wala nagdugay, ginbiyaan ni Ka Cocoy ang personal nga interes nga mangin pari kag sa baylo nangin lubos panahon nga organisador sa sektor sang mga pamatan-on kag estudyante sa Cebu. Sang 1985, nangin kabahin siya sang *fact-finding mission* nga nag-usisa sang madinuguon nga Escalante Massacre.

Tungod sa wala nagakapalong nga panin-

"Taas kamao..." sundan sa pahina 3



HULYO 2023

Nagapasalamat ang *Ang Paghimakas* sa mga kontribusyon agud mangin madinalag-on ang ini nga isyu. Sa pagpauswag sang aton *Ang Paghimakas*, ginapangabay sa tanan nga bumalasa nga padayon nga mag-amot sang mga balita, piktyur, istorya kag iban pa nga sinulat. Nagapangayo man kami sang inyo mga suhestyon kag komentaryo paano pa gid ini pauswagon.

ANG **Paghimakas**



angpaghimakas@protonmail.com



negrosrevportal.wordpress.com

"Taas kamao..." halin sa pahina 2

dugan, narekrut si Ka Cocoy sa Communist Party of the Philippines (CPP) kag sa ulihi nagpatapo sa NPA sa Sentrong Kabisay-an. Nangin kabahin siya sang tim nga nagpatigayon sang *Social Investigation and Class Analysis* (SICA) sa rehiyon nga nagserbe nga basehan para sa padayon nga pagpalapad kag konsolidasyon sang rebolusyon.

Sa panahon sang pagsipak sadtong ulihi nga bahin sang 1980, si Ka Cocoy ang malig-on nga nanindugan para sa mga sandigan nga prinsipyo sang Partido sa pihak sang rebisyunista nga habiyog sang pipila ka katapo sang pamunuan sang CPP. Sadtong temprano nga bahin sang 1990, nagbulig siya sa pag-edukar sa mga kadre sang Partido, Pulang hangaway kag mga masa sa Sentrong Kabisay-an may kaangtanan sa Ikaduha nga Dunganon nga Kahublagan Panadlong.

Gin-deploy si Ka Cocoy sa isla sang Negros sadtong 1998 kag, bilang katapo sang Probisyunal nga Komiteng Tigpatuman sa isla, ginpasiguro niya ang hilikuton sa edukasyon sa Larangan Gerilya 1 (Central Negros Front sa subong). Ang hugot niya nga pag-uyat sa Marxista nga estilo sang pagtuon ang nag-

resulta sa iya mga positibo nga amot sa pagrekober, pag-abante kag liwat nga pagpapagsik sang rebolusyonaryo nga kahublagan sa Negros.

Sang natukod ang KRPIN sadtong 1999, nangin kabahin siya sang rehiyonal nga kalihiman bilang ikaduha nga sekretaryo para sa edukasyon. Sang 2000, nangin sekretaryo siya sang Larangan Gerilya 2 (South Central Negros Front sa subong) kag nanguna sa ekspansyon kag pagrekober padulong sa southwest Negros. Matapos ang lima ka tuig, nangin *Political Commisar* siya sang Apolinario Gatmaitan Command, ang *Regional Operational Command* sang NPA sa isla sang Negros.

Sa dalayon, nangin sekretaryo si Ka Cocoy sang North Negros Front (NNF) sadtong 2006 tubtob sang iya pagkabilanggo sa San Carlos City, Negros Occidental sang 2014. Paagi sa giya sang Partido kag iya nga pagpamuno bilang sekretaryo sang NNF, komprehensibo nga napauswag ang tatlo ka integrado nga sangkap sang inaway banwa—pagtukod sang baseng masa, armado nga paghimakas kag rebolusyon agraryo.

Madamo sang madinalag-on nga anihilatibo nga taktikal nga

opensiba ang nalunsar lakip ang reydsang detachment sang AFP sa Sityo Pulupangyan, Brgy. Bugang, Toboso kag Sityo Minabuno, Brgy. Malasibog, Escalante City sa Negros Occidental nga nakakuha sang kabilugan nga 25 ka matag-as nga riple. Ang mga kontra-pyudal nga kampanya nga nagpatuhaw sang mga rebolusyonaryo nga organisasyon masa kag nagpahapos sa pagtukod sang baseng masa naglapnag sa anum ka syudad kag tatlo ka banwa kon sa diin may mga bungkalan nga nagsakop sang 62 ka asyenda kag masobra 2,000 ka ektarya nga napuslan sang 3,000 ka mga mangunguma kag mamumugon sa uma. Sa paglab-ot sang tatlo ka integrado nga sangkap, dugang nagbakod ang Roselyn Jean Pelle Command sang NPA sa diin ang larangan gerilya nagdako sa tatlo ka platon.

Sa tunga sang todo-gyera sang rehimen Duterte sadtong 2019, si Ka Cocoy ang nangin sekretaryo sang KRPIN. Isa man siya sa mga kadre nga nagpanguna sa madinalag-on nga pagsumada sang 25 ka tuig nga inagihan sang rehiyon sa paglunsar sa pungsodnon demokratiko nga rebolusyon. Siya ang nagapahulag nga pwersa sang komprehensibo nga mga kampanya kontra-ensirkulo kag permi nga nagaduso nga magtuon sa pakig-away paagi sa pagpakig-away. Sang ginpasingki sang AFP kag Philippine National Police (PNP) ang ila mga *focused military operation* sa idalom sang subong nga ilehitimo nga rehimen Marcos, nagtinguha siya nga pangunahan ang KRPIN sa pagsolbar sa mga problema kag mga kahuyangan nga nakasablag sa rebolusyonaryong kahublagan sa Negros nga lubos mapanginbabawan ang atake sang kaaway kag pataason ang halintang sang inaway banwa sa isla.



"Taas kamao..." sundan sa pahina 4

"Taas kamao..." halin sa pahina 3

Si Ka Cocoy ang mapainubuson kag masinadyahon nga kaupod, masami nga nagalibot sa kampo para mangita sang tugalpo kag layaw nga uhong para makaon. May yara siya sang kinaiya nga pagkapalalahog samtang naga-huna-huna man sa kabudlayan sang mga kaupod. Bukas siya kag tampad, maukod sa pagduso sang husto nga ideolohikal, pampulitika kag organisasyonal nga linya kon kinahanglan. Maayo siya sa kritikal nga kinaiya sa pagtuon sang teorya. Nagapaninguha siya nga makigbahin sa pagpraktika sang rebolusyonaryong hilikuton ilabi na sa pagbulig nga malubad ang krusyal nga mga hambalanon nga, kung indi malubad, maka-hatag sang kabudlayan sa dalayon.

Magagahin siya sang oras kag pasensya sa pagbahin sang iya rebolusyonaryo nga inagihan sa mga lamharon nga mga kadre kag tudluan sila bahin sa Marxista nga pilosopiya. Sa pihak sang kaabanse sa edad, wala naka-paluya kay Ka Cocoy ang mga sakripisyo kag kabudlayan. Sa mabudlay nga tion, nangin giya siya sang rebolusyonaryo nga optimismo; nagapahanumdom sa mga kaupod nga dapat handa sa opensiba, nga permi kuhaon ang inisyatiba kag mangin mahinalungon sa pagbasa sa kahimtangan agud mapat-od ang pag-angkon sang kadalag-an.

Tubtob sa ulihi niya nga gin-hawa, isa ka rebolusyonaryo si Ka Cocoy. Isa siya ka Marxista nga ginkabuhi ang ginahambal nga bug-os tagipusuon nga ihalad ang kabuhi sa pag-alagad sa pumuluyo—ilabi na ang mga mangunguma kag mamumugon sa uma sa Negros—nga gin-updan niya para hibaluon ang ila kabudlayan, makigbato upod sa ila kag pangunahan sila agud maangkon ang katilingban nga may matuod nga kahilwayan kag

Ang kamatayon sang kaupod

ni Ka Tingting

Handurawon ang kaupod nga pinalangga
Nga sa mga kamot sang kaaway nagtaliwan na
Bangud sa pagpuas sang mga luha,
Kaakig, kaisog kag determinasyon magabulos na.

Mga luha nga nagaagay sa mga mata
Nangin likido nga nagadabok
Sa kaaway nga kaakig
Agud kalayo sang rebolusyon magadabadaba.

Ang kamatayon sang kaupod sa anuman nga rason
Bangud sa pasismo sang kagamhanan
Indi katapusan ukon kahuyangan
Kundi dungganon nga inspirasyon sa pagsulong sang rebolusyon.

Kamatayon, kasubong kabug-at sang Kanlaon
Kayahon nga pas-anon
Bangud ang kaupod nag-alagad sa
masang pigos kag
ginahimuslan
Kaupod, padayon
ka namon
palanggaon kag
handurawon. **AP**



makatarunganon kag pangma-lawigon nga kalinong.

Mahimo nga napatay ang lawas ni Rogelio Posadas apang ginbilin niya ang buhi nga legasiya sang halangdon nga mga kadalagan kag leksyon nga magagiya sa bag-o nga henerasyon sang mga rebolusyonaryong Negrosason paano isulong ang pungsodnon demokratiko nga rebolusyon. Gin-pasa niya sa lamharon nga mga kadre ang husto nga panindugan, panan-awan kag pamaagi sa pag-atubang sa komplikado kag mabug-at nga mga pangka-

tilingban nga kamatuoran sang pungsod, sang kasaysayan kag sang paghimakas sang pumuluyo. Ang iya nga kabuhi isa ka libro sang dungganon nga mga estorya kon ano ang pagpalangga kag paano palanggaon ang pumuluyong Pilipino. Puno sa diwa ni Ka Cocoy, liwat nga mapaslaw sang mga Negrosanon ang lutaw nga handum sang kaaway nga wasakon ang NPA sa Negros kag, sa proseso, mapasaglab kag mapalapta ang kalayo sang inaway banwa sa isla! **AP**

Buhi si Ka Rogelio "Ka Cocoy" Posadas, Dungganon ang Iya Kabuhi!

ni Ka Felipe Fernando

ANG KAMATAYON NI KA RO-GELIO Posadas ukon Ka Cocoy indi ordinaryo. Siya kag kaupdanang niya ang pwersadong ginabdak sang mga armadong ahente pangseguridad sang estado kag gindala sila sa isa ka sikretong lugar agud paantuson sang mabangis nga pagtampalas sang ila pagkatawo. Gin-agwanta ni Ka Cocoy ang mga kasakit sang tortyur kag sapatnon nga pag-abuso samtang nag-atubang sang mapahugon nga interogasyon. Agud mabulong ang ila kauhaw sang dugo, ginhimo sang berdugo nga militar ang pagpatay sa wala ika-sarang magbato nga Ka Cocoy samtang nagpabilin nga "missing" ang tatlo niya ka kaupdanan.

Mabaskog nga ginpakamalaut sang pumuluyo, mga pamilya kag *human rights organizations* ang pag-abdak, ilegal nga pag-aresto, pagtortyur kag pagpatay nga mga hinimoan sang kriminal nga pwersang militar. Si Ka Cocoy isa ka consultant sang National Democratic Front of the Philippines (NDFP) kag may ara siya sang proteksyon sang *Joint Agreement on Safety and Immunity Guarantees* (JASIG) nga pirmado nga kasugtanan sa tunga sang NDFP kag Government of the Republic Philippines (GRP). Mabaskog man nga ginademanda sa mga kriminal nga militar nga ila ipakita ang lawas sang mga upod ni Ka Cocoy, buhi ukon patay.

Sin-o si Ka Rogelio Posadas? Ano ang iya nga mga ginhimo ngaa ang mga pwersa pangseguridad sang estado magkomitir sang mapintas nga mga akto sang terorismo?

Daku nga bahin sang kabuhi ni Ka Cocoy, sugod sang tion nga isa pa siya ka estudyante nga semi-

narista agud tani magpuri kag tubtob sa ulihi nga adlaw sang iya kabuhi, gingamit niya para updan, suportahan, kag alagaran ang masang imol nga taga-syudad, mamumugon, mangingisda kag mangunguma nga nag-antus sa kaimulon, ginahimuslan, ginapigos kag ginaterorisa sang mga gamhanan nga komprador-agalon mayduta, dalagku nga burukrata kag mga kapitalistang dumuluong.

May ara siya sang madalom nga pagpalangga sa pumuluyong Pilipino ilabi na sa mga anakbalhas nga sahing mumumugon kag mangunguma. Ang iya paghigugma sa pumuluyo naghaling sa iya pagkilala sang mga interes nila bilang iya man kaugalingon nga interes. Napundar ini kag nagdalum paagi sa iya pagpakigbahin sa adlaw-adlaw nga pag-antus kag paghimakas batok sa mga nagahimulos kag nagapigos nga nagaharing sahi nga mga dalagku nga komprador burgesyia kag agalon mayduta kag ila mga pasintang instrumento. Ini nga partisipasyon sa praktikal nga kabuhing sosyo-ekonomiko kag politikal upod sang mga masa subong man ang iya matutom nga pagtuon sang Marxista-Leninista-Maoista nga rebolusyonaryong teorya lakip na ang mga pagtuon sang kasaysayan sang pumuluyong Pilipino kag mga sinulat ni Prof. Jose Maria Sison kag iban pa nga mga progresibo kag patriyotikong manunulat ang nagpadalom sa iya siyentipiko nga pundasyon.

Ang gugma ni Ka Cocoy ginasuklian man sang mga masa kag sang iya kaupdanang sang madalom nga pagpalangga. Ginakabig siya subong bilang indi malipatan nga bayani kag martir, ila matuod nga abyan kag kaupod.

Rebolusyonaryong kadre sa Sentrong Kabisay-an

Suno sa pipila ka internal nga mga dokumento sang rebolusyonaryong kahublagaan, si Ka Cocoy nangin isa sa mga rebolusyonaryong kadre sa Sentrong Kabisay-an nga nag-abante sa pagtungod sa mga rebolusyonaryong hilikuton nga nakatutok sa politikal nga katuyoan sa pagpasulong sang kontradiktadurya nga nagahiliugyon nga prente paagi sa ligal nga demokratikong kahublagaan sa sentro nga syudad kag sa pagpabaskog sa armadong paghimakas sa kaumhan sang Bohol kag Cebu. Matapos mapalagpot ang dikta-duryang Marcos kag sa atubang sang nagbulos-bulos kag nagapakuno-kuno nga mga demokratikong gobyerno, nagtuhaw ang mga malain nga senyales sang mga internal nga problema sang mga suhetibong pwersa sang rebolusyon.

Isa si Ka Cocoy sa unang mga nangahas sa pagtuon sa dokumento sang kahublagaan panadlong sang Partido, pagbalik-tuon sa mga sandigan nga dokumento sang Unang Kongreso sang Partido samtang aktibo man nga nagpakig-away batok sa huwad nga karaan nga liderato nga nangin mga kontra-Partido nga rebisyunista kag kontra-kahublagaan panadlong nga mga pwersa. Kabahin man siya sa pila ka kadre sang Partido nga naghimo sang komprehensibo nga pagsuma sang rebolusyonaryong inagihan sang Sentrong Kabisay-an agud matungdan ang importanteng hilikuton sang kritikal nga pagsaway kag pagsaway sa kaugalingon.

"Bubi..." *halin sa pahina 5*

Isa man siya sa mga nanguna para kadungan nga malunsar ang kampanyang pagtuon teoretikal sa kabilogan nga kubay sang mga rebolusyonaryong pwera.

Ini nga mga kontribusyon nagresulta sa madasig nga rekoberi sang Partido sa Sentrong Kabisay-an kag ini ang nanguna sa pagbandera sa pagbaskog sang armadong paghimakas kag naghiliugyon nga prente sa pungsod sa katapusan nga bahin sang 1990s. Ini nga mga kadalag-an nangin puhonan agud ang rehiyon makabulig sa iban nga mga rehiyon.

Ginhatagan ni Ka Cocoy sang panahon ang direktang pag-upod kag pagganar sang eksperyensya (halin sa wala direktang eksperyensya) sa yunit sang Hukbo sa pagtungod sang tatlo nga integradong sangkap sang mga bulhaton sa kaumhan—pagtukod sang baseng masa, rebolusyon agraryo kag armadong paghimakas. Ang amo nga manggaranon nga eksperyensya bitbit niya sang ginpadala sang Partido sa isla sang Negros.

Dungganon nga lider sa isla sang Negros

Si Ka Cocoy ang una nga kadre sang rehiyon sa Sentrong Kabisay-an nga boluntaryo nga nagpa-deploy sa isla sang Negros sadtong una nga bahin sang 1998 agud dugangan ang dako nga pagbuhin sang mga kadre. Nagbulig siya sa pagpatuman sa Ika-duha nga Dungganon nga Kahublagan Panadlong (IDKP) kag rekoberi halin sa dalagku nga pag-atras kag mga kahalitan kag sa liwat nga pag-abanse sang rebolusyonaryong kusog. Ang iya naangkon nga lebel sang teorya kag praktika sa pagpamuno kag pagpatuman sang IDKP sa ginhalinan nga rehiyon nangin importante nga kontribusyon para

mangin madinalag-on ang pagsulong sang kahublagan panadlong sa Negros, rekoberi kag liwat nga pagpabaskog sang rebolusyonaryong kusog sa kaumhan kag syudad, pagkalutos sang mga rebolusyonaryong traydor kag pagpaslaw sa mga dalagku nga kampanya militar sang pag-ensirkulo kag supresyon sang AFP/PNP sang nagbulos-bulos nga rehimen sulod sa sobra tatlo ka dekada.

Sang ginsaylo sa Negros, padayon nga ginpakita ni Ka Cocoy ang estilo sang pagtuon sang nagliligad kag ini nagreplek ukon nag-salamin man sang maayo nga estilo sa pagtrabaho—pagkombinar sang pangkabilogan kag sang partikular, kag pagtilaw sang kahustohon sang pangkabilogan nga polisiya ukon panawagan kon nagasanto sa partikular nga parte ukon sakop. Direkta siya nga nakaagum sang inagihan sa pagpamuno sa Komite sang Larangan kag tayuyon nga nagtungod sa rebolusyonaryong hilikuton. Naka-papel man siya sa pagtukod sang kompanya-kadakuon nga larangan gerilya halin sa platun nga kadakuon nga relatibong baskog sa tulo ka integral nga hilikuton sang pagtukod sang baseng masa, rebolusyon agraryo kag taktikal nga opensiba.

Dugang nagmanggad ang paghangop ni Ka Cocoy sang mga sandigan nga prinsipyo sang Partido paagi sa muklat nga pagtinguha upod sa mga kaupod sa pagtigayon sang pagtuon sang partikular nga kasaysayan sang kabuhi kag mga paghimakas sang mga masa paagi sa sosyal nga imbestigasyon kag pagpanalawsaw. Isa siya sang nagpadalom sa pagpanalawsaw kag pagtuon sa partikular nga kinaiya sang malapyudal nga sistema sa Negros nga nanguna nga nakabase sa dominante nga

"Bubi..." *sundan sa pahina 7*

Isa si Ka Cocoy sa unang mga nangahas sa pagtuon sa dokumento sang kahublagan panadlong sang Partido, pagbalik-tuon sa mga sandigan nga dokumento sang Unang Kongreso sang Partido samtang aktibo man nga nagpakig-away batok sa huwad nga karaan nga liderato nga nangin mga kontra-Partido nga rebisyonista kag kontra-kahublagan panadlong nga mga pwera.



"Buhi..." halin sa pahina 6

monocrop nga produksyon sang kalamay para sa eksport kag sa lokal nga merkado, kon sa diin diri nagabase ang partikular nga kinaiya sang reaksyonaryong politika kag ang epekto sini sa kabuhi kag mga paghimakas sang pumuluyo. Ini nga ginhimo nga pagtuon nangin giya para isulong ang malapnagon kag madinalagon nga pag-okupar kag pagbungkal sang gin-angkon nga mga duta sang mga agalon mayduta nga kumon nga ginatawag bilang asyendero.

Nagmarka bilang iya signipikante nga kontribusyon ang pagseguro nga matigayon ang ebalwasyon kag mayor nga mga kongklusyon sang pagsuma sa kasaysayan sang rebolusyonaryong kahublagan sa Negros sa pipila ka kritikal nga panahon. Sang 2005, sa Ikaduha nga Rehiyunal nga Komperensya sang Partido sa Negros, daku man ang iya nangin papel sa ginhimo nga pagsumada sa rebolusyonaryong inagihan sa isla halin sa panahon sang kahublagan panadlong. Sang 2016-2018, may-ara man siya sang mga importante nga kontribusyon sa paghim-os sang re-

hiyunal nga pagsuma kag sa paningkamot nga mapangibabawan ang kabudlay sa pagpino sa husto nga mga leksyon kag ebalwasyon sang partikular nga rebolusyonaryong inagihan halimbawa sang larangan gerilya sa north Negros.

Isa ka Marxista sa tanan nga bahin

Ang pag-uswag sa paghangop sang Marxistang estilo sang pagtuon indi matawhay, indi hapos kag indi naga-usoy sang matadlong nga dalan. Magluwas sa kaugalingon nga mga kahuyangan kag limitasyon, may ara man mga kabudlayan kag pana-panahon nga halit nga tuga sang mga mabangis nga mga opensiba militar sang AFP/PNP. Diri makita ang paghatag ni Ka Cocoy sang daku nga importansya sa husto nga estilo sang pagtuon paagi sa pagkombinar sang teorya kag praktika. Kon ano ka dalom ang iya pagpalangga sa mga masa amo man ang kadalumon sang iya pagtib-ong sa diyalektika sang teorya kag praktika, paghibalo kag pagtungod; halin sa nubo nga lebel sang kaalam kag pakadto sa pataas nga lebel sang kaalam.

Ginkilala ni Ka Cocoy nga indi him-os kag perpekto ang pag-uswag sang mga bagay. Mag-agi ini sang proseso sang pagtilaw kag sang indi malikawan nga sayop. Bangud sa pagkilala sang diyalektika sang husto kag sayop, ginpakita ni Ka Cocoy ang kamahalalon sang prinsipyo kag praktika sang pagsaway kag pagsaway sa kaugalingon kag sang kondukta sang banggianay sang mga ideya. Talalupangdon ang iya ginpakita nga katampad sa pag-uyat sang pagsaway kag pagsaway sa kaugalingon sa atubang sang masalimuot kag masingki nga mga eksperyensya sa isa ka larangan kag sa lebel sang rehiyon sang Negros. Iya ginpakita ang kahandaan sa pagresolbar sang mga problema kag hambalanon paagi sa mapagsik nga banggianay sang mga ideya sa sulod sa proseso sang organisasyon kag matapos ang masangkad nga proseso, magpaidalom ang tanan kag magtib-ong sa nalab-ot nga kongklusyon ukon paghusga sang mayoriya sang kolektibo.

Sa kabilogan, ini nga pagtinguha ni Ka Cocoy sa pag-

"Buhi..." sundan sa pahina 8

Pula nga Pagsaludo sa imo, Ka Rogelio Posadas!

Mensahe sang Leonardo Panaligan Command-NPA Central Negros Front

ISA KA MILITANTE KAG MATAAS nga pagpasidungog ang ginahatag sang Leonardo Panaligan Command-New People's Army Central Negros Front (LPC-NPA) kag sang bug-os nga rebolusyonaryong masa sa Central Negros kay Ka Rogelio Posadas (Ka Cocoy), sa iya mga kontribusyon kag legasiya diin nagpalig-on sa determinasyon sang mga kaupod kag bug-os nga rebolusyonaryong kahublagan agud atubangon ang lain-lain nga porma sang pagpangangkat sang panahon sa pag-usoy sa banas sang rebolusyon sa isla.

Si Ka Cocoy ang ginkilala sang bug-os nga rebolusyonaryong pwersa sa isla sang iya kinaiya nga pagka-ahitador kag edukador sa masa kag mga kaupod. Matawhay kon maghambal apang madalom kag matalom sa pag-analisa sang sitwasyon sa isa ka diyalektikal nga pagsolbar sang mga nagaluntad nga problema internal ukon eksternal man.

Optimismo kag determinasyon ang ginakahidlawan sang masa kag mga kaupod kay Ka Cocoy. Isa siya sa mga maisog kag determinado nga kadre sang Partido sa isla nga nagpakig-away batok

sa mga rebisyunista kag oportunistang traydor nga naglihis sa linya, patakaran kag mga sandigan nga prinsipyo sang Partido kag iban pa nga kasaypanan sa ideolohiya, pulitika kag organisasyon sadtong dekada '90. Patay-buhi si Ka Cocoy nga naglubog sa mga organisasyon masa, yunit sang Partido kag NPA sa pagpukaw, pag-organisa kag pagpahulag sa masa kag bug-os nga rebolusyonaryong pwersa agud pangunahan ang simple nga pagpangabuhi kag matutom nga paghimakas sa pagpangibabaw sa tanan nga unos sang rebolusyon dira sa espiritu sang Ikaduha nga Dungganon nga Kahublagan Panadlong.

Halin sa gamay nga kusog sang Partido kag NPA kag makitid nga baseng masa bunga sa pagganoy sang mga rebisyunistang traydor sa suhetibismo, wala-tuo nga oportunismo, burukratismo kag ultra-demokrasya, pursigido si Ka Cocoy upod sa mga responsableng kadre sa pagtukod sang mga larangan gerilya sa isla. Sa pihak sang bagyo sang pasismo, nangin kapaslawan sa kaaway sa sahi kag mga mapintas nga makinaryas sini nga AFP,

PNP kag bayaran nga Revolutionary Proletarian Army-Alex Bongcayao Brigade (RPA-ABB) nga pungan ang pagtukod sang lima ka aktibo nga larangan gerilya sa isla.

Nagdaku ang isip kag nagbaskog ang mga yunit sang NPA kag labi nga nagalapad kag naglig-on ang baseng masa paagi sa lig-on kag absoluto nga pagpamuno sang Partido. Nangin komprehensibo ang pagsulong sang inaway banwa gikan dekada '90 tubtob subong nga panahon sang US-Marcos II.

Aminado si Ka Cocoy nga ang imperyalismo, burukrata-kapitalismo kag imperyalismo amo ang ugat sang madalom nga kaimulon sa pungsod. Haku niya ang maragtas sang pungsod kag lubos niya nahangpan nga malakolonyal kag malapyudal ang kinaiya sini diin lapnagon ang pagpanghimulos kag pagpamigos sang isa ka porsyento nga agalon may duta, dalagku nga burgesya komprador kag burukrata kapitalista upod sa ila amo nga imperyalistang Estados

"Pula..." sundan sa pahina 9

"Buhi..." halin sa pahina 7

pauswag sang iya estilo sang pagtuon nagtagos sa iya estilo sang pagpamuno kag paghikot nga nagsubay sa prinsipyo sang linyang masa, muklat nga disiplinado nga paghulag kag kritikal sa kaugalingon nga pagtuon sa kolektibong praktika.

Husto ang paghangop ni Ka Cocoy kabahin sa pundamental nga tesis ni Lenin nga, "kon wala sang rebolusyonaryong teorya, wala sang rebolusyonaryong ka-

hublagan" ang mga masang pumuluho. Buhi si Ka Cocoy paagi sa iya ginbilin nga mga maayo nga halimbawa kag mga leksyon halin sang iya mga positibo kag negatibo nga inagihan. Ang iya pagpalangga kag pag-alagad sa mga masang Pilipino sa sulod sang halos 40 ka tuig nangin malig-on, siyentipiko, tayuyon kag gani padayon nga nangin mabakud sang nag-atubang sa mga mabug-at kag komplikado nga mga problema sa sulod sang rebolusyonaryong kahublagan kag mga gin-

tuga nga halit sang mabaskog nga mga terorismong kampanya militar sang AFP/PNP sang mga papet nga rehimen.

Ginapaathag man nga ang mga kontribusyon ni Ka Cocoy nahimo niya upod kag sa bulig sang madamo pa nga kaangay niya nga mga maayo nga rebolusyonaryo sulod sa ginsiling nga mga katuigan. Amo nga aton suliton, buhi si Ka Cocoy kag dungganon ang iya kabuhi kag sang iban pa nga mga martir sang rebolusyon Pilipino! **AP**

Kumbinsido si Ka Cocoy nga demokratikong rebolusyon sang banwa paagi sa pangmalawigon nga inaway banwa dira sa balayon sang armadong paghimakas ang solo nga solusyon sa pagpatuman sang matuod nga reporma sa duta kag pungsodnon nga industriyalisasyon.

"Pula..." halin sa pahina 8

Unidos. Kumbinsido siya nga demokratikong rebolusyon sang banwa paagi sa pangmalawigon nga inaway banwa dira sa balayon sang armadong paghimakas ang solo nga solusyon sa pagpatuman sang matuod nga reporma sa duta kag pungsodnon nga industriyalisasyon.

Nagapati man si Ka Cocoy nga ang pag-isa sang nagkalain-lain nga sahi sang sosyedad dira sa pungsodnon nga nagahiliugyon nga prente sa pagpamuno sang abante nga destakamento sang sahing proletaryado nga amo ang Communist Party of the Philippines ang magserbi nga kusog sang sahing anakbalhas sa pagpukan sa kaaway sa sahi. Rason nga halin dekada '80 padayon nga gin-usoy sa isa ka Rogelio Posadas ang banas sang armadong paghimakas ilabi na ang pagpakig-away sa mapintas nga Martial Law sang anay diktaduryang US-Marcos Sr tubtob subong nga rehimen US-Marcos Jr.

Ang ini nga maragtason nga inagihan ni Ka Cocoy sa pakig-rebolusyon, ang sulundon kag nag-serbi nga inspirasyon sa mga pamatan-on kag aktibista sa kas-yudaran kag kaumahan sa pagpadayon sang armadong paghimakas. Ini man ang sulundon kag inspirasyon sang mga hubines nga mga kadre sang Partido kag mga Pulang kumander kag hangaway sang NPA sa pagsulong sang armadong paghimakas agud padaugon ang inaway banwa tubtob malab-ot ang pungsodnon nga kahilwayan kag demokrasya.

**Ka Cocoy, buhi ka nga handumanan sa amon pagpadayon sa armadong rebolusyon!
Tunay ka nga baganihan sang rebolusyon!
Ikaw ang amon inspirasyon sa pagpadayon!
Mabuhay ka, Kaupod!
Mabuhay ang tanan nga mga rebolusyonaryong martir! **AP****



Rogelio 'Ka Cocoy' Posadas, mapag-on nga kadre sang Partido

Mensahe sang Rachele Mae Palang Command - NPA Southeast Negros Front

ANG MGA KADRE SANG PARTIDO, mga Pulang kumander kag hangaway, kag ang bug-os nga rebolusyonaryong pwersa sang Rachele Mae Palang Command - New People's Army Southeast Negros Front (RMPC-NPA) ang nagahatag sang pinakamabakud nga Pulang saludo kay Rogelio 'Ka Cocoy' Posadas, anay sekretaryo sang KRPIN. Tungod sa iya indibidwal kag kolektibo nga naamot, ang rebolusyonaryong kahublagan sa isla ang nagpabilin sa gihapon sa tunga sang wala untat nga mga pasistang pagpang-atake sang US-Duterte nga rehimen nga gilayon ginsundan sang ilehitimo nga rehimen US-Marcos II.

Paagi sa absoluto nga pagpamuno sang KRPIN, nasarangan sang NPA Negros nga panginbabawan ang madinuguon nga kontra-insurhensya nga gyera sang kaaway. Sa pag-uyat kag pagkabisa sang gerilyang taktika sa pagbalhin, konsentrasyon kag dispersal, napreserba sang mga yunit sang NPA ang kaugalingon kag husto nga nakapahaom sa kahimtangan sa pihak sang abanse nga armas kag teknolohiya sang kaaway. Mas ginpalala ang sosyo-ekonomiko kag makitawhanon nga krisis sa isla sang minilyon ka piso ang gingasto sang AFP, PNP kag National Task Force (NTF)-Elcac para sa mga ginapatigayon nga mga *focused military operation*, pwersahan nga pagpasurrender, operasyon saywar, peke nga engkwentro, kag lapnagon nga paglapas sa tawhanon nga kinamatarung, nga dugang nagkombinsi sa pumuluyo nga ang paglunsar lang sang inaway banwa ang



makabatak sa ila nagaluntad nga kondisyon.

Partikular sa southeast Negros, ang sugilanon sang 'ginbungkag' nga larangan gerilya ang nagapabilin nga patupato lamang. Si Ka Cocoy ang isa ka mapag-on nga kadre sang Partido nga nagagiya sa mga rebolusyonaryong pwersa sa larangan gerilya agud atubangon ang mga kabudlayan ano man ini kabudlay. Masami niya nga ginahambal nga, "Masarangan naton ini tungod ara ang masa!" Ginapahanumduman niya ang mga kaupod nga ang masa ang wala nagakahubas nga tuburan sang inspirasyon agud magpadayon ang mga mapangaway nga tahas sang NPA.

Gani, tuman nga maka-ulugot

nga si Ka Cocoy ang ginpatay nga wala-kaluoy sang mga pwersa sang estado, samtang ang iya upod kag ang duha ka drayber ang gin-missing sang 3rd ID.

Kung katuyuan sang kaaway nga paluyahon ang mga rebolusyonaryo nga pwersa paagi sang makasilidni nga pagpamatay ukon pag-aresto sa mga *hors de combat*, balikan naton ang linya ni Ka Cocoy: samtang yara ang pagpamigos, magapadayon ang suporta kag pag-ulikid sang masa sa NPA, kag bisan ano ka daku ang pagpatuyang nga paggasto sang militar indi ini mabungkag ang handum sang pumuluyo para sa rebolusyonaryo nga pagbag-o **RP**

Si Ka Cocoy (Rogelio Posadas) bilang isa ka kaupod

ni Ka Lobel

Pulang hangaway halin sa Mt. Cansermon Command-NPA South Central Negros Front

INDI GID MAKALIPATAN BILANG ISA ka rebolusyonaryo, ilabi na diri sa Negros, ang bulawanon nga tampo ni Kasamang Rogelio Posadas ukon mas ginkilala nga si Ka Cocoy/Tomas/Totie sa mga kaupod sa south central Negros. Isa siya ka sulondon kag inspirasyon sa madamu nga mga kaupod kag sa rebolusyonaryong pwersa bangud sa iya hingpit kag matuod nga pagkarebolusyonaryo.

Indi lang nga maayo nga rebolusyonaryo ang pagkabis sa mga kaupod sa kay Ka Cocoy. Isa siya ka amay, hait nga kumander, maestro kag mahilig nga magkanta.

Amay bangud malapit siya sa mga kabataan kag kon sa mga kaupod masami gid nimo mabatian ang laygay niya nga daw amay kon imu siya kais-torya.

Isa ka hait nga kumander bangud magluwas sa iya maayo nga pagpamuno sa armadong paghimakas dire sa Negros, permi gid niya gina-edukar ang mga Pulang hangaway kag kumander sa mga prinsipyo kag laye sa dalagan sa inaway banwa. Masami nga mabatian sa iya: "Permi pamen-saron bilang suldado sang pumulyo kag indi gid kalipatan nga ang kaaway nagaatake sa aton kag sa kada panahon nagapamensar sila kon paano ta madugmok. Amo na nga dapat indi gid magpakaliberal ilabi na sa seguri-dad." Nangin pagtulun-an ini sa mga kaupod nga indi simple ang pakigrebolusyon tungod naga-atubang kita sa patay-buhi nga hilikuton, kag prinsipyo ini nga dapat uyatan ilabi na nagasulong kita sa armadong rebolusyon.

Maalam kag manami kais-torya si Ka Cocoy. Hilig niya ang

siyensya, partikular ang astro-nomiya. "Kabalo ba kamo kon ano ang *star* nga pinakamalapit sa *Earth*?" ang masami niya nga pamangkot sa mga kaupod. Hilig niya man ang mga pelikula nga *science fiction* kaangay sang *Star Wars*. Madamo kami sang malab-otan nga mga istorya kon ini ang mga topiko kag mga rebolusyonaryo nga hambalanon.

Sa malawig niya nga pagrebolusyon, ginpakita ni Ka Cocoy sa praktika kon ano ang isa ka proletaryado. Bisan may edad na ini, makita nimo ang kapagsik kag determinasyon sa bisan ano nga sakripisyo kag kabudlayan nga masumalang sa pagsulong sa rebolusyon. Madamo man ang mga limitasyon ilabi na sa ikaayong lawas, mas nagapangibabaw gi-hapon ang rebolusyonaryong diwa nga tubtob sa iya masarangan magsulong sang armadong paghimakas.

Sa kay Ka Cocoy makita ang "simple nga pangabuhi kag mainantuson nga paghimakas." Isa siya sa pinakamaayo nga maestro nga indi lang sa teorya nagatudlo sa imo kundi sa praktika. Kag siyempre, kon kis-a isa ka *singer* nga permi nagakanta sang mga rebolusyonaryong ambahanon samtang naga-earphones. Mabatian nimo ang iya pagkanta nga abi mo nagabasa lang.

Matuod nga bisan malukat man ang pinakadaku nga puno sang lasang, ini naman magahatag sang lat-ang nga agian sang kasanag sang adlaw para sa mas daghan pa nga puno nga magatubo. Indi masayang ang kabuhi nga nautas ni Ka Cocoy bangud ang iya dugo magahatag katambok sang duta para sa rebolusyon. Magapabilin nga buhi

ang iya handum kag padayon ini nga sugponan sang bag-ong henerasyon.

Mabuhay ang dungganon nga rebolusyonaryo nga si Ka Cocoy!

Mabuhay ang rebolusyon! AP

.....   **NegrosRevPortal**

Isa sa mga ambahanon nga ulihi nga nabatian nga ginkanta ni Ka Cocoy:

Lupang Sinira

Bayang mahiwaga sa malayong silangan

Alab ng puso, sa dibdib mo'y apoy

Lupang sinira, bayan ng magigiting

Sa manlulupig hindi pagagapi

Sa nayon at lungsod

Nagkaisa makabayang mamamayan

May tilamsik ang tula at awit

Sa paglayang inaasam

Ang kulay ng watawat mo'y

Tagumpay na magniningning

Ang bituin at araw niya'y

Hindi magdidilim

Laya ay langit kaluwalhati't pagsinta

Buhay ay lupa sa piling mo

Aming ligayang makitang

Ang baya'y di api

ang mamatay ng dahil sa iyo.

Rebong diwa nga iwag

ni Ka Adelle Malaya

Nadula ka man diri sa kalibutan
 Apang nagapabilin ka sa amon paminsaron kag
 dughan
 Ang imo kakahas nga pag-alagad sa katawhan
 Nangin inspirasyon kag ubay sa amon tanan.

Saludo kami sa imo rebong proletaryong
 kamuklatan
 Sahing ginhalinan, ginsikway kag
 ginpangibabawan
 Burgis nga kaisipan, ginhimakasan sa piyak sang
 kabudlayan
 Abri ang kaugalingon sa mga pagsaway sa
 kahuyangan.

Ang imo rebong kaisog kag kaalam indi gid
 namon malipatan
 Dira sa pagpasulong sa armadong paghimakas
 sa kaumahan
 Rason nga kaaway sa sahi matandog ang
 paghari kag nasakitan
 Kag nagahandum nga wasakon ang armadong
 kahublagan.

Paano mawasak ang timgas nga binhi nga
 natisok sa matambok nga kadutaan?
 Duta nga imo ginkultibar agud binhi magatubo
 bisan diin pa man
 Nga magaserbi ini sang ginapigos kag
 ginahimuslan
 Apang kaaway sa sahi desperado nga nagahimo
 sa pasistang tikang.

Ang imo pagpamuno nangin inspirasyon sa
 amon tanan
 Ikaw Partido nga pareho sang timgas nga binhi
 nga nag-alagad sa katawhan
 Ang katawhan pareho sang isa ka matambok
 nga kadutaan
 Kag ikaw ang amon instrumento agud tinggas
 nga binhi magalapta.

Apang pasistang kaaway, desperado nga
 wasakon ang kadutaan
 Nagsabwag sang hilo agud binhi mapapas kag
 mahalitan
 Ikaw ang gindakop kag ginpatay sang mga
 lampingasan
 Sa pagpati nga mawasak ang rebong
 kahublagan.

Ila handum nga pagwasak sigurado nga
 mapaslawan
 Bangud ang imo rebong diwa nakapanggamot sa
 nagahimakas nga katawhan
 Isa ang madula, madamo ang mamuklat kag
 magapadayon
 Agud wasakon ang sistemang mapang-ulipon.

Bayani ka sang nagahimakas nga katawhan
 Pareho ka sang bituon sa kalangitan
 Bisang malayo ka sa amon panan-awan
 Apang ang imo rebong diwa nagaiwag sa amon
 dalan.

Dalan nga puno sang kadulom, apang amon
 subayon
 Bangud yara sa imo iwag ang nagaubay sa amon
 dalan pagpanglakaton
 Ang imo kamatayon nangin hangkat sa amon
 nga magpadayon
 Nagahatag kaisog agud kabudlayan
 mapangibabawan namon.

Indi mo man masaksihan, aton lubos nga
 kadalag-an
 Pero ikaw nangin kabahin sa rebong kasaysayan
 Bangud ikaw proletaryong bayani sang
 katawhan
 Imo diwa nga matutom sa pagduso sa
 katawhan, indi gid namon malipatan. **AP***

